

**Kommunit Namminersorlutillu Oqartussat missingersuutaat naatsorsuutaallu pillugit
Inatsisartut Inatsisaat nr. 26, 28. november 2016-imeersoq**

Kapitali 1

Inatsisip atortuuffia

§ 1. Inatsit atortussaatinneqarpoq kommuninut aamma Namminersorlutik Oqartussanut, taakku-nunnga ilanngullugit ingerlatsiveqarfinnut, naalakkersuisoqarfinnut, paaqqinnittarfinnut, suliffeqar-finnut il. il., taakku missingersuutaat kommunit ukiumoortumik missingersuutaannut imaluunniit Namminersorlutik Oqartussat aningaasanut inatsisaannut ilanngunneqarsimappata.

Imm. 2. Naalakkersuisut aalajangersinnaavaat inatsimmi malittarisassat aamma inatsit naapertor-lugu malittarisassat tamakkiisumik ilaannakortumilluunniit suliffeqarfinnut, peqatigiiffinnut, ani-ngaasaateqarfinnut il. il. atuutsinneqassasut:

- 1) taakku ingerlatsinermi imaluunniit naatsorsuutitigut amigartoorutaat kommuninit Namminersor-lutilluunniit Oqartussanit tapiissutitigut imaluunniit inatsit naapertorlugu tapersiilluni tunissuteqar-toqarneratigut, akitsuutitigut allatigulluunniit isertitatigut matussuserneqassappata, imaluunniit
- 2) kommuninit, Namminersorlutik Oqartussanit imaluunniit suliffeqarfinnit il. il. nr. I-imi ilaatinne-qartunit aningaasaliiffigineqartartunut, tapiissutisisartunut, taarsigassarsisinneqartunut, qularna-veequsiiffigineqartunut allatigulluunniit taperneqartunut, tassa aningaasaliissutit il. il. tiguisussap ingerlatsineranut annertuumik pingaaruteqarpata.

Imm. 3. Imm. 2 atuutsinneqassangilaq inatsimmi allami suliffeqarfiup, peqatigiiffiup imaluunniit aningaasaateqarfiup missingersuusiornissaanut naatsorsuusiornissaanullu malittarisassanik aalaja-ngersaasoqarsimappat.

Kapitali 2

Missingersuutininik oqimaaqatigiissitsineq taarsigassarsinerlu

Missingersuutininik oqimaaqatigiissitsineq

§ 2. Missingersuutit tamarmiusut pisortat aningaasaqarneranni tamarmiusuni ukiut sisamat inger-laneranni oqimaaqatigiissinneqassapput imaluunniit sinneqartoorfiussapput.

Imm. 2. Missingersuutit oqimaaqatigiissinneqarnissaannik piumasaqaat imm. 1-imi pineqartoq naammassineqarsimassaaq:

- 1) kommunip ukiumoortumik missingersuutaani imaluunniit Namminersorlutik Oqartussat aningaa-sanut inatsisaanni isertitat, ingerlatsinerit sanaartorerillu nalinginnaasut inernerit tamarmiusut ukiut sisamat ingerlaneranni amigartoorfiunngippata,
- 2) kommunit imaluunniit Namminersorlutik Oqartussat ingerlatsinermut aningaasartuutaat tamarmi-usut ukiumut annerpaamik 1,5 procentinik qaffassimappata aamma ukiut sisamat ingerlaneranni qaffariaataat annerpaamik 2,00 procentiuppat, aamma

3) kommunit imaluunniit Namminersorlutik Oqartussat ingerlatsinermut nuussisarnermullu aningaasartuutaat tamarmiusut ukiut sisamat ingerlaneranni isertitassatut naatsorsuutigineqartut annerpaamik 93 procentiisut annertutigippata.

Imm. 3. Nalinginnaasumik isertitat tassaapput § 18, imm. 3-mi isertitanut pineqartunut sanilliullugu isertitat allat.

§ 3. Nikingassutaagallartup piffissami ungasinngitsumi aningaasaqarnikkut atasinnaassuseq ulorianartorsiortissanngippagu immikkorluinnaq pisoqartillugu § 2, imm. 1-mi piumasagaatip taaneqartup saneqqunnissaanut Naalakkersuisut inassuteqareernerisigut Inatsisartut Aningaasaqarnermut Akileraartarnermullu Ataatsimiititaliaat akuersissuteqarallarsinnaavoq.

Imm. 2. Pissutsit immikkut illuinnartut tassaapput pisut nalinginnaasuunngitsut Namminersorlutik Oqartussat nakkutigisinnaanngisaat aamma pisortat aningaasaqarnerannut tamarmiusumut pingaaruteqarluinnartumik sunniuteqartartut imaluunniit piffissat ilaanni aningaasaqarnikkut annertuumik kinguariartitsisartut.

§ 4. Naalakkersuisoq taanna Naalakkersuisut Siulittaasuata erseqqinnerusumik aalajangersaaneratigut tamatumunnga piginnaatinneqartoq ukiut tamaasa apriilip naalernerani ukiuni aningaasanut inatsiseqarfiusuni 4-ni tulliuttuni inerniliunneqartunut § 2, imm. 2, nr. 2 aamma 3-mi taaneqartunut missingersuusianut killiliussanullu naatsorsuutininik suliaqassaaq.

Piginnaatitsissut

§ 5. Missingersuutininik naatsorsueriaasissaq pillugu Naalakkersuisut erseqqinnerusumik malittari-sassaliorsinnaapput.

Taarsigassarsineq

§ 6. Naalakkersuisut inissianut, inuussutissarsiuutinut attaveqaatinullu suliniutinut aatsaat taarsigassarsisinnaallutilluunniit taarsigassarsinissamut akuersisinnaapput, atuisut akiliutaat, pisortat aningaasartuutaasa annikillizat pisortalluunniit kinguneqaatitut isertinneruligassaasa minnerpaamik taarsigassarsiamut atasumik erniat taarsersuutitullu akiliutit matussusersinnaappasigut. Taamattaq aningaasaliissutit taneqartut ungasissumik isigisumik aningaasarsiornermut politikip attanneqarsinnaaneranut ikiorfartuisuussapput.

imm. 2. Imm. 1 aamma aningaasalersueriaatsini tulliuttuni atoneqassaaq:

- 1) akiitsunik pisussaaffinnik tigusinerni
- 2) qularnaveeqqutinik pisussaaffinngoratarsinnaasunik allanik tigusinerni,
- 3) aningaasatigut attartornermik isumaqatigiissuteqarnermi, imaluunniit
- 4) pisortat namminersortullu suleqatigiinnerannik il.il. isumaqatigiissusiornerni

Imm. 3. Imm. 1-imi 2-milu taaneqareersutut taarsigassarsititsisoqarnissaani taarsigassarsinissaq taarsigassarsianillu akuersinissaq il.il. pillugit malittarisassanik erseqqinnerusunik Naalakkersuisut aalajangersaasinnaapput.

Kapitali 3

Aningaasaliissuteqarnermi tunngaviit

§ 7. Ukioq aningaasanut inatsiseqarfiusoq 1. januaarimiit 31. decembarip tungaanut sivisussuseqarpoq.

§ 8. Aningaasaliissuteqartoqaqqaartinnagu aningaasartuuteqartoqassanngilaq aamma isertitaqartoqassanngilaq, taamaattoq tak. § 23, imm. 2

Kapitali 4

Aningaasanut inatsit, ukiumoortumik missingersuutit il. il.

Namminersorlutik Oqartussat aningaasanut inatsisaat

§ 9. Naalakkersuisut aningaasanut inatsisissatut siunnersuut ukioq aningaasanut inatsiseqarfiusus-saq sioqqullugu kingusinnerpaamik ulloq 1. september saqqummiutissavaat.

Imm. 2. Aningaasanut inatsisissatut siunnersuutip imarissavai Nunatta Karsiata ukiumi aningaasanut inatsiseqarfiusumi aningaasartuutai isertitaalu tamaasa.

§ 10. Ilanngaatitaqanngitsumik naatsorsuisarneq tunngavigalugu aningaasartuutissanut isertitassanullu missingersuutit aningaasanut inatsisissatut siunnersuummi immikkoortinneqassapput.

Imm. 2. Aningaasartuutissat missingersuutaanni ingerlatsinermi aningaasartuutit kiisalu isertitat tamarmik ilanngunneqassapput.

Imm. 3. Isertitassat missingersuutaanni naalagaaffiup Namminersorlutik Oqartussanut tapiissutai aamma akileraarutitigut akitsuutitigullu isertitat ilanngunneqassapput. Aamma iluanaarutit, pigisaniq nalilinnik tunisinerit, sanaartorneq il. il. isertitassatut aningaasaliissutinut ilanngunneqassapput.

§ 11. Aningaasanut inatsisitigut aningaasaliissutit naalakkersuisup aalajangersakkat erseqqinnerusumik aalajangersarneqarsimasut malillugit atuinissaanut piginnaatitsissutaapput.

Imm. 2. Naalakkersuisoq oqartussaaffimmi aningaasaliissutaanut akisussaasuvoq. Naalakkersuisup akisussaasuusup aningaasaliissutit atorluarneqarnissaat qulakkiissavaa.

§ 12. Aningaasaliissutinut oqaasertaliisoqarsinnaavoq. Oqaasertaliussat taamaallaat aningaasaliissutit aqunneqarnissaannut tapertaassapput.

Imm. 2. Oqaasertaliussat ukiumi aningaasanut inatsiseqarfiusumi aningaasanut inatsimmut oqaasertaliiffiusumi taamaallaat atuutissapput.

Imm. 3. Oqaasertaliussat aqputigalugit inatsimmut atuuttumut aalajangersakkanik tigussaasunik allanik ilanngussisoqarsinnaavoq. Oqaasertaliussat aqputigalugit inatsisunik atuuttunik allanngueq immikkorluinnaq pisoqartillugu, allannguutissallu piffissamut aalajangersimasumut atuuppata aatsaat pisinnaavoq.

Imm. 4. Oqaasertaliinikkut ataavartumik nalinginnaasumilluunniit inatsimmik allannguisoqarsinnaanngilaq.

Imm. 5. Oqaasertaliussat ukiumi aningaasanut inatsiseqarfiusumi tullermi aningaasaliissuteqarnisamat siuarsaasuussanngillat.

§ 13. Naalackersuisut aningaasanut inatsisissatut siunnersuutip suliarineqarnissaanut aqqissuuneqarnissaanullu malittarisassaliorsinnaapput.

Imm. 2. Naalackersuisut aningaasat atorneqanngitsut ukiup tullianut nuutassat pillugit malittarisassaliorsinnaapput.

Imm. 3. Naalackersuisut immikkoortunut pilersaarusiornissamat immikkoortup pineqartup iluani periusissianik sukkuilluunniit atuuttunik takutitsisunut malittarisassaliorsinnaapput.

Sanaartornerit, iluarsagassat il.il.

§ 14. Aningaasanut Inatsisissatut Siunnersuut Namminersorlutik Oqartussat sanaartugassaasa iluarsagassaasalu pilersaarusiornissaannut aningaasaliissutissanut siunnersuutininik imaqarpoq.

Stk. 2. Aningaasanut Inatsisissatut Siunnersuut Namminersorlutik Oqartussat sanaartugassaasa iluarsagassaasalu suliarinissaannut aningaasaliissutissanut siunnersuutininik imaqarpoq.

§ 15. Aningaasanut Inatsisissatut Siunnersuut Namminersorlutik Oqartussat illuutitut aalaakkaasunut, sanaartortitsinernut suliaassanullu allanut aningaasaliissutissanut siunnersuutininik imaqarpoq.

Imm. 2. Aningaasanut Inatsisissatut Siunnersuut Namminersorlutik Oqartussat sanaartortitsinissanut iluarsagassanullu taarsigassarsititsisoqarnissaanut neriorsuutaannut aningaasaliissutissanut siunnersuutininik imaqarpoq.

Imm. 3. Aningaasanut Inatsisissatut Siunnersuut Namminersorlutik Oqartussat sanaartortitsinissanut iluarsagassanullu tapiissuteqarnissaannut aningaasaliissutininut siunnersuutininik imaqarpoq.

§ 16. Aningaasaliissutit § 14 aamma § 15-imi taaneqartut atornissaat pillugit Naalackersuisut ukiumoortumik nassuiaammik Inatsisartunukartussamik suliaqartassapput. Nassuiaat ilaatigut suliniutit nutaat, suliniutit aallartinneqartut aamma suliniutit naammassineqartut unitsinneqartulluunniit pillugit immikkut killiffimmik imaqassaaq.

§ 17. Atuinikinnerusoqarneranut sanaartortitsinerit imaluunniit iluarsaanerit kinguaattoorfiusimanerat pissutaasimappata aningaasaliissutit taaneqartut ukiunut aningaasanut inatsiseqarfiusunut tulliuuttunut § 14 aamma § 15-imi taaneqartunut nuunneqarnissaat pillugit malittarisassanik Naalakkersuisut aalajangersaasinnaapput.

Piffissaq ungasinnerusq eqqarsaatigalugu aningaasaliissuteqarnissamut Aningaasaateqarfik

§ 18. Piffissaq ungasinnerusq eqqarsaatigalugu aningaasaliissuteqarnissamut Aningaasaateqarfik missingersuusioriaatsimut naatsorsuusioriaatsimullu aningaasaateqarfiuvoq Nunatta Karsianut ilaatinneqartoq.

Imm. 2. Aningaasaateqarfiup siunertarivaa piffissamut ungasinnerusumut aningaasaateqarnissaq eqqarsaatigalugu aningaasaateqarfiup aningaasaataanik aningaasaliissuteqartarnissaq. Aningaasaateqarfiup aningaasaatai piffissaq ungasinnerusq eqqarsaatigalugu toqqissisimanartumik, iluanaarutaanerpaaffiusumik pitsaanerpaamillu inuiaqatigiit aningaasaqarnerannut sunniuteqarnissaat anguniarlugu aningaasaliissutigineqassapput.

Imm. 3. Aningaasaateqarfimmut akiliutit nuunneqartassapput immikkut ittumik isertitanit ukunanga:

- 1) Ingerlatseqatigiiffiit nunanit allaneersut aatsitassarsiornermi misissuinerannut sanaartornerannullu atatillugu ingerlatseqatigiiffiup akileraarutaanit 30 mio. kr.-nik amerlanerusunit Nunatta Karsiata iluanaarutaanit pissarsiat.
- 2) Aningaasarsianit akileraarutit pillugit Inatsisartut Inatsisaanni § 72 b naapertorlugu akileraarutit A-t.
- 3) Namminersorlutik Oqartussat pigisaannik 50 mio. kr.-t sinnerlugit nalilinnik tunisaqarnermit iluanaarutit.
- 4) Soraarnerussutisiassanik imaluunniit inuunermut sillimmasiisimanernik Danmarkimi, Savalimiuni nunaniluunniit allani soraarnerussutisiassanut aningaasaateqarfinnut nuussinernit imaluunniit inuunermik soraarnerussutiassanillu sillimmasiisarfiimmit Kalaallit Nunaanni najugaqartumit akileraarutinit akitsuutinillu iluanaarutit.
- 5) Nunatta Karsiata naatsorsuutaanit sinneqartoorutit ukiup aningaasanut inatsiseqarfiusup kingorna ukiup naannginnerani atorneqarsimanngitsut.

Imm. 4. Imm. 3 naapertorlugu iluanaarutit tiguneqarnerannit kingusinnerpaamik qaammatip ataatsip qaangiunnerani aningaasaateqarfimmut nuunneqassapput.

Imm. 5. Imm. 3 malillugu akiliutigineqartut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat naapertorlugu isertitanut Kalaallit Nunaata Aatsitassarsiornermi Aningaasaateqarfianut ikineqartussanut imaluunniit Namminersorlutik Oqartussat aatsitassanit isertitaqarsinnaatitaanerit aamma ataatsimoortumik tapiissutisisinnaatitaanerit pillugu inatsit naapertorlugu isertitanut ilaatinneqanngitsut naalagaaffiup Namminersorlutik Oqartussanut ataatsimoortumik tapiissutaannik ikilisisissapput.

Imm. 6. Ukiut aningaasanut inatsiseqarfiusut akornanni akiliutigineqartut nikingassutaat aningaasaateqarfimmi nalimmassarneqassapput.

Imm. 7. Piffissaq Ungasinnerusq Eqqarsaatigalugu Aningaasaliissuteqarnissamut Aningaasaateqarfiup ingerlaavartumik aqunneqarnera Naalakkersuisut Siulittaasuata erseqqinnerusumik aalajangersaaneratigut naalakkersuisumut tunniunneqassaaq.

Imm. 8. Naalakkersuisut aningaasaateqarfiup missingersuusiortarnissaanut naatsorsuusiortarnissaanullu malittarisassaliorsinnaapput.

Imm. 9. Naalakkersuisut minnerpaamik ukiumut ataasiarlutik Piffissaq ungasinnerusq eqqarsaatigalugu aningaasaliissuteqarnissamut Aningaasaateqarfiup suliai pillugit Inatsisartunut nassuiaasiortassapput, tassunga ilanngullugu suliniutit nutaat, suliniutit ingerlanneqartut naammassineqarsimasullu imaluunniit unitsiinnarneqarsimasut killiffii immikkut naatsorsussavaat. Nassuiaat kingusinnerpaamik Nunatta Karsiata naatsorsuutaasa saqqummiunneqarnerani naammassineqarsimassaaq naatsorsuutinullu ilanngullugu suliarineqassalluni.

Imm. 10. Naalakkersuisut aningaasaateqarfiup aningaasaataanik aningaasaliissuteqartarnissaq pillugu erseqqinnerusumik aalajangersagaliorsinnaapput.

Aningaasaliissutit nutaat allanngortitalluunniit

§ 19. Naalakkersuisut ilassutitut aningaasaliiffigineqarnissamik qinnuteqaasiornissamut erseqqinnerusunik aalajangersagaliorsinnaapput.

Kommunit ukiumoortumik missingersuutaat, ukiunut arlalinnut missingersuutaat il. il.

§ 20. Aningaasaqarnermut Ataatsimiititaliaq kommunip ukiumut aningaasanut inatsiseqarfiussamut tullermut ukiumoortumik missingersuutissaanik kommunalbestyrelsimut siunnersuusiussaaq. Siunnersuutit ukiunut tulliuttunut minnerpaamik pingasunut missingersuusianik imaqassapput.

Imm. 2. Ukiumoortumik missingersuusiap imarissavai kommunipisertitassai aningaasartuutissaalu tamarmiusut kiisalu kommunip aningaasaataasa tigorianaanaat aamma aningaasaqarnikkut naatsorsuutaasa nikingassutaat.

Imm. 3. Ukiumoortumik missingersuutit aningaasartuutissatut isertitassatullu aamma nikerartussanut allanut ilimagineqartunut tamatigut takussutissaassaaq. Kommuninut ataatsimoortumik tapiissutinik tunniussisoqarneranut atatillugu siunertanut aalajangersimasunut erseqqinnerusunut aningaasanik immikkoortitsisoqarnissaanut isumaqatigiissuteqartoqarsimappat ukiumoortumik missingersuutini ikinnerpaamik aningaasanik taakkuninnga siunertamut pineqartumut immikkoortitsisoqassaaq.

Imm. 4. Ukiumoortumik missingersuusiaz tunngavissiissanngilaq taarsigassarsinissamut, attartornissamut imaluunniit attartortitsinissamut, tassa Naalakkersuisunit akuersissummik pisariaqartinneqartumik tunniussisoqarsimatinnagu imaluunniit kommunalbestyrelsip malittarisassat atuuttut naapertorlugit Naalakkersuisunit akuersissummik pissarseqqaarani taarsigassarsinissaanut, attartornissaanut imaluunniit attartortitsinissaanut.

Imm. 5. Naalakkersuisut missingersuusiornissamut aamma ilassutitut aningaasaliissuteqarnissa-

mut malittarisassaliorsinnaapput kiisalu kommunit aningaasaatissaannut tigorianaannut minnerpaamik piumasagaasiorsinnaallutik.

§ 21. Aningaasaqarnermut Ataatsimiititaliap ukiumoortumik missingersuutissatut ukiunullu arlalinnut missingersuutissatut siunnersuutai kommunalbestyrelsimi minnerpaamik sapaatit akunnerisa marluk akornanni marloriarlugit suliarineqassapput.

Imm. 2. Ukiumoortumik missingersuutitut siunnersuut kommunip nittartagaatigut tamanut saqqummiunneqassaaq peqatigitillugulu siunnersuut siullermeerneqartussanngorlugu aappassaaneerneqartussanngorlugulu kommunalbestyrelsip ilaasortaanut nassiunneqarluni. Siunnersuut aamma Naalakkersuisunut ilisimatitsissutitut nassiunneqassaaq.

Imm. 3. Ukiumoortumik missingersuutissatut aamma ukiunut arlalinnut missingersuutissatut siunnersuutit marloriarlugit suliarineqarnissaannut periusissatut malittarisassat kommunalbestyrelsip suleriaatsimini aalajangersassavai.

Imm. 4. Ukiumoortumik missingersuusiap aappassaaneerlugu oqaluuserineqarnissaanut inaarutaasumik piffissaliussassaaq Naalakkersuisut aalajangersassavaat, aamma ukiumoortumik missingersuusiami kommunalbestyrelsip inaarutaasumik akuersissuteqarnermini aningaasaliissuteqarfissanik isummerfigisassaani naatsorsuutit immikkoortiterneqarnissaannut malittarisassaliorsinnaapput.

Imm. 5. Ukiumoortumik missingersuutit akuersissutigineqarnerannit kingusinnerpaamik ullut 14-it qaangiunneranni taakku assilinerat Naalakkersuisunut nassiunneqassapput.

§ 22. Ukiumoortumik missingersuutit ukiunullu arlalinnut missingersuutit akuersissutigineqarnerannit kingusinnerpaamik ullut 14-it qaangiunneranni kommunimi innuttaasunit takuneqarsinnaangussapput.

Imm. 2. Ukiumoortumik missingersuutit ukiunullu arlalinnut missingersuutit imaasa naatsumik nassuiarneqarnerat ukiup aningaasanut inatsiseqarfiusussap tulliaata aallartinnginnerani kommunip nittartagaatigut tamanut saqqummiunneqassapput.

§ 23. Ukiumoortumik missingersuutini naatsorsuutit kommunalbestyrelsip ukiumoortumik naatsorsuutini akuersissuteqarnermini aningaasaliissuteqarfissanut tunngatillugit isummerfigisai § 21, imm. 3 naapertorlugu kommunip ingerlatsineranut pisussaaffiliipput.

Imm. 2. Aningaasaliissuteqarnissamut oqartussaaffik kommunalbestyrelsimiippoq. Suliniutit inatsisitigut, peqqussutitigut imaluunniit allatigut inatsisitigut aalajangersakkatigut peqqussutigineqartut pisariaqartitsinermi kommunalbestyrelse aningaasaliissuteqaqqaanngikkaluartoq aallartinneqarsinnaapput, aningaasaliissutilli piaarnerpaamik pissarsiarineqarsinnaasariaqarput. Kommunilbestyrelsillu aammattaaq aningaasaqarnermut ataatsimiititaliaq pisinnaatissinnaavaa ingerlatsinermi aningaasartuutissanik missingersuutiniittunik nikisiterisinnaanermut kiisalu sanaartugassanut aningaasaliissutinik sanaartugassanut allanut nuussisinnaanermik.

Imm. 3. Ilassutitut aningaasaliissutaasut tamarmik aningaasartuutissatut akuersissutigineqartut qanoq matussuserneqarnissaannik paasissutissanik imaqaassapput, ukiunut missingersuusiorsifiusunut

kingunerisinnaasai ilanngullugit. § 21, imm. 3-mi ilassutitut aningaasaliissutitik atuisinnaanermut assinguvoq.

§ 24. Imm. 2-mi malittarisassatut aalajangersakkat apeqqutaatillugit kommunit Naalackersuisunit akuerineqarnatik:

- 1) taarsigassarsinnaanngillat allanillu akiitsunik pisussaaffilersinnaanatik,
- 2) qularnaveeqqussisinananatik aallanillu pisussaaffinngoratarsinnaasunut tiguisinnaanatik,
- 3) attartartorsinnaanatik leasinginillu isumaqatigiissuteqarsinnaanatik,
- 4) pisortat namminersortullu suleqatigiinnerannik il.il. isumaqatigiissussiorsinnaanatik, imaluunniit
- 5) aalajangersimasumik akiliutigisartakkamik assigisaanilluunniit neriorsuinnaanngillat, kommunit inatsisit naapertorlugu isumagisassarinnngisaannik.

Imm. Naalackersuisut malittarsiassanik, kommunit erseqqissumik aalajangersarlugit killiliussani iluanni imm. 1-imi taarsigassarsinnaanermik il.il. pisinnaatitsisunik aalajangersaassapput. Naalackersuisut tassani pisananatitsissummi, kommunit aningaasaqarnermik, missingersuutitik il.il. aqutsinernermik piunasaqaatinik naammassinninnissaat tunngavissaatissinnaavaat.

Kapitali 5

Aningaasartuutitik nakkutilliineq

Sioqqutsisumik aningaasartuutitik nakkutilliineq

§ 25. Kommunit Naalackersuisullu tamarmik ukiumi aningaasanut inatsiseqarfiusumi piffissani aalajangersimasuni naatsorsuutit, paasissutissat allat aamma kommunip pineqartup oqartussaaffeqarfiilluunniit ataasiakkaat ukiumut aningaasanut inatsiseqarfiusumut tunngatillugu naatsorsuumminnik kingullernik misissuisimanermi naliliinerat pigineqartut tunngavigalugit ukiumi aningaasanut inatsiseqarfiusumi aningaasaliissutissat sinnerlugit atuisoqassanersoq nakkutigissavaat.

Imm. 2. Kommunip Naalackersuisulluunniit imm. 1 malillugu aningaasartuutitik nakkutilliinerisigut paasinarsippat kommunip pineqartup imaluunniit Namminersorlutik Oqartussat ukiumut aningaasanut inatsiseqarfiusumut inaarutaasumik naatsorsuutaasa ukiumi aningaasanut inatsiseqarfiusumi aningaasaliissutissat sipporsinnaagaat, taava kommuni pineqartoq Naalackersuisorluunniit ukiumi aningaasanut inatsiseqarfiusumi aningaasaliissutit sippuisussat naatsorsuutigineqartut matussuserneqarnissaat anguniarlugu iliuuseqartoqarnissaannik aalajangiissapput.

§ 26. Kommunit Naalakkersuisullu tamarmik ukiumi aningaasanut inatsiseqarfiusumi piffissani aalajangersimasuni erseqqinnerusuni § 25, imm. 1 malillugu aningaasartuutunik kingullermik nakkutilliinermi inernerit pillugit aamma § 25, imm. 2 malillugu aalajangiisinnaanerup imarisai erseqqinnerusut pillugit naalakkersuisumut Naalakkersuisut Siulittaasuannit erseqqinnerusumik aalajangersaanikkut immikkut tassunga piginnaatinneqartumut paasissutissanik nalunaaruteqartassapput.

Imm. 2. Imm. 1-imi taaneqartutut kommuni nalunaaruteqarsimangippat Naalakkersuisup Siulittaasuata tassunga piginnaatitsineranut aalajangersakkat erseqqinnerusut malillugit naalakkersuisuutitaq nalunaassaaq kommuni ullut suliffiusut 10-t qaangiutsinnagit nalunaaruteqassasoq. Piffissamut killiliusaaq qaangerneqarpat nalunaaruteqartoqarnissaa tikillugu kommuninut ataatsimoortumik tapiissutit tunniunneqartussat 10 procentii uninngatinneqassapput. Nalunaaruteqartoqarpat ataatsimoortumik tapiissutit uninngatinneqartut tunniunneqassapput.

Imm. 3. Paasissutissat tunngavigalugit naalakkersuisoq Naalakkersuisup Siulittaasuata erseqqinnerusumik malittarisassat malillugit tassunga piginnaatitaata ukiumut aningaasanut inatsiseqarfiusumut kommunit Namminersorlutillu Oqartussat aningaasartuutaannut naatsorsuutini kisitsisit kingullit isertitariumaakkanut sippuissanersut nakkutigissavai. Naalakkersuisoq taanna Naalakkersuisup Siulittaasuata aalajangersakkat erseqqinnerusut malillugit tassunga piginnaatitaa nakkutilliinissamut atugassanik paasissutissanik kommuninut piniarsinnaavoq.

Imm. 4. Imm. 3 naapertorlugu aningaasartuutunik nakkutilliinermi paasineqarpat ukiumi aningaasanut inatsiseqarfiusumi kommunit Namminersorlutilluunniit Oqartussat aningaasartuutaat pillugit inaarutaasumik naatsorsuutit kommunit Namminersorlutilluunniit Oqartussat ukiumi aningaasanut inatsiseqarfiusumi isertitaasa 2,5 procentii sinnerlugit sipporneqarsimasut, kommunalbestyrelsip kommuni sinnerlugu imaluunniit Naalakkersuisut Namminersorlutik Oqartussat sinnerlugit ullut 30-t qaangiutsinnagit aningaasanit tamarmiusunit atorneqarsinnaasut killilissavaat, tassa ukiumi aningaasanut inatsiseqarfiusumi missingersuutit sipporneqarnissaannik naatsorsuutigisap annertoqataanik killilissavaat, taamaattorli imm. 5 takuuk.

Imm. 5. Kommunimut tunngatillugu kommunalbestyrelsi imaluunniit Namminersorlutik Oqartussanut tunngatillugu Naalakkersuisut ukiumi aningaasanut inatsiseqarfiusumi naatsorsuutigisatut sippuinerit sapinngisamik matussuserniarlugit allatut iliuseqarnikkut atorneqarsinnaasunik killiliisoqannginnissaa pillugu aalajangiisinnaavoq imaluunniit atorneqarsinnaasut killilimmik killilerneqarnissaat pillugu aalajangiisinnaavoq.

§ 27. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq § 25, imm. 1 aamma § 26, imm. 1-imi taaneqartut malillugit akulikinnerusumik aningaasartuutunik misissueqqusilluni aamma paasissutissanik tunniusseqqusilluni kommunimut peqqusisinnaavoq, matumani kingullermik aningaasartuutunik nakkutilliinermi inernerit kommunimut ukiumoortumik naatsorsuutitigut kisitsisit inaarutaasut isertitassatut naatsorsuutaasunut 2,5 procent sinnerlugu amigartoorfusinnaanerit takuneqarsinnaassappat.

Imm. 2. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq § 25, imm. 1 aamma § 26, imm. 1-imi taaneqartut malillugit akulikinnerusumik aningaasartuutunik nakkutilleeqqusilluni aamma paasissutissanik tunniusseqqusilluni peqqusisinnaavoq, matumani aningaasartuutunik nakkutilliinerni tulleriinni 2-ni inernerit kommunip isertitaasa 2,5 procent sinnerlugu inaarutaasumik kisitsisinik qaangiisinnaanerat takuneqarsinnaappat.

Imm. 3. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq, imm. 2-milu pisut malillugit pisariaqartinneqarpat, aningaasartuutunik misissueqqissaartoqarnissanik kommunimut peqqusisinnaavoq.

Aningaasartuutunik nakkutilliinissaq tulliuuttoq

§ 28. Kommunit tamarmik Naalakkersuisullu ukiumi aningaasanut inatsiseqarfiusumi nutaami kingusinnerpaamik qaammatit pingasut siulliit naaneranni misissussavaat ukiumi aningaasanut inatsiseqarfiusumi kingullermi aningaasartuutit pillugit naatsorsuutit kisitsisitaasa kommunip Namminersorlutilluunniit Oqartussat ukiumi aningaasanut inatsiseqarfiusumi kingullermi isertitaat sipporsimaneraat.

Imm. 2. Kommune ataaseq imm. 1-imi pineqartoq naapertorlugu nalunaaruteqanngippat Aningaasaqarnermut Naalakkersuisoqarfiup kommune ullunik suliffiusunik qulinik piffissalerlugu nalunaaruteqaqqussavaa. Piffissaliussaq malinneqanngippat kommunip nalunaaruteqarnissaata tungaanut kommunimut tapiissutissat 10 procentii uninngatinneqassapput. Nalunaaruteqartoqarpat tapiissutissat uninngatinneqartut tunniunneqassapput.

§ 29. § 28, imm. 1 malillugu Naalakkersuisut aningaasartuutunik nakkutilliineranni paasinarsippat ukiuni aningaasanut inatsiseqarfiusuni kingullerni 4-ni naatsorsuutitut kisitsisit pigineqartut Namminersorlutik Oqartussat ingerlatsinerannut sanaartortitsinerannullu isertitanit 1 procent sinnerlugu amerliartorfiusunik amigartoorfiusut Naalakkersuisut Aningaasaqarnermut Akileraartarnermullu Ataatsimiititaliaata akuersissuteqareerneratigut ullut 30-t qaangiutsinnagit ukiumut aningaasanut inatsiseqarfiusumut nutaamut Namminersorlutik Oqartussat aningaasaliissutaanni aningaasat amerliartorfiusumik amigartooruteqarfiusut ukiuni aningaasanut inatsiseqarfiusuni 4-ni kingullerni isertitat aqutugalugit 1 procent sinnerlugu qaangerneqarsimappata minnerpaamik 33,33 procentiinik ikilisaassapput aningaasanillu atorneqartussanik assinganik aalajangiillutik, taamaattoq imm. 2 takuuk. Ukiuni aningaasanut inatsiseqarfiusuni 4-ni siuliini amerliartorfiusunik amigartoorutaasut sinneruttut ukiup aningaasanut inatsiseqarfiusup nutaap kingornagut ukiuni aningaasanut inatsiseqarfiusuni 3-ni Namminersorlutik Oqartussat aningaasaliissutaannik ikilisaassapput.

Imm. 2. Naalakkersuisut Aningaasaqarnermut Akileraartarnermullu Ataatsimiititaliap akuersissuteqareerneratigut, ukiunilu 4-ni aningaasanut inatsiseqarfiusuni siuliini ingerlatsineranut sanaartortitsinerannullu amerliartorfiusumik amigartoorutaasut iliuitsit allat aqutugalugit akuerineqarsimappata, ukiumut aningaasanut inatsiseqarfiusumut nutaamut ukiunilu aningaasanut

inatsiseqarfiusuni tulliuuttuni Namminersorlutik Oqartussat aningaasaliissutaannik ilanngaasoqarnissaanik imaluunniit taakkuninnga killilimmik ilanngaasoqarnissaanik aalajangiisinnaapput. Oqaaseqatigiinni siullerni pisut pineqartut pippata Naalakkersuisut taamatutaaq atorneqarsinnaasunik killiliisinnaapput.

§ 30. Naalakkersuisoq taanna Naalakkersuisut Siulittaasuata aalajangersagai erseqqinnerusunut malillugit tamatumunnga piginnaatinneqartoq kommunip ukiuni siuliini 4-ni naatsorsuutai isertitaniit 2,5 procent sinnerlugu amerliartorfiusumik amigartoorfiusut paasineqarpat ukiumi tapiissuteqarfiusumi Namminersorlutik Oqartussat kommuninut ataatsimoortumik tapiissutaanik ilanngaassaaq. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiumi aningaasanut inatsiseqarfiusumi siullermi aningaasat 40 procentiinik ilanngaasoqassaaq. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiumi aningaasanut inatsiseqarfiusuni tulliuuttuni 3-ni aningaasat 20 procentiinik ilanngaasoqassaaq.

Imm. 2. Ukiuni aningaasanut inatsiseqarfiusumi siullermi ilanngaanernut ukiumi tapiissuteqarfiusumi qaammatini juulimi, aggustimi, septembarimi, oktobarimi, novembarimi aamma decembarimi assigiimmik ilanngaanermut akiliisoqassaaq. Ukiuni aningaasanut inatsiseqarfiusuni tulliuuttuni ukiup ingerlanerani qaammatit 12-k assigiimmik ilanngaanermut akiliisoqassaaq.

Imm. 3. Naalakkersuisut imm. 1 naapertorlugu appaassutigineqartunik naatsorsuinissamut akilersuinissamullu erseqqinnerusumik malittarisassaliorsinnaapput, tassunga ilanngullugu naatsorsuusi- ornermut aamma missingersuutit naatsorsuutillu imminnut sanillersuunneranni aaqqitassat pisaria- qartut pillugit immikkut ittumik kukkunersiuinermi uppersaatit pissarsiniarsinnaallutik.

Ilisimatitsinerit

§ 31. Aningaasartuutunik Namminersorlutik Oqartussat kommunillu nakkutilliineranni inerniliussat pingaernerit pillugit Naalakkersuisut kingusinnerpaamik 1. september aamma 1. december Inatsisartut Aningaasaqarnermut Akileraartarnermullu Ataatsimiititaliaanut kiisalu Kukkunersiuinermut Ataatsimiititaliamut ilisimatitsisassapput, tamannalu pillugu paasissutissanik Namminersorlutik Oqartussat internetimi nittartagaatigut tamanut saqqummiussillutik. Ilisimatitsissut ilaatigut §§ 14-17-imi aningaasaliissutini taaneqartuni atuinermut tunngasunik immikkut killiffimmik imaqassaaq suliniutinullu nutaanut, neriorsuutitut il.il., suliniutinut aallartereersunut, neriorsuutitut il.il. aamma suliniutinut naammassisanut imaluunniit unitsuinnakkanut, neriorsuutitut il.il. agguataarlugit.

Imm. 2. Naalakkersuisut qaammatit arfinilikkaarlugit Namminersorlutik Oqartussat nittartagaat atorlugu pisortat akiitsuusa tamarmiusut takussutissartaat tamanut saqqummiuttassavaat.

§ 32. Kalaallit Nunaata aningaasaqarnera pillugu ukiumoortumik nalunaarusiaq, tassunga ilan- ngullugu pisortat aningaasartuutaasa isertitaasalu ineriartornerat Naalakkersuisut Inatsisartut uper-

naakkut ataatsimiinneranni saqqummiuttassavaat. Ukiumoortumik nalunaarusiap imarissavai qitiu-sumik aningaasartuuteqarfiusartuni isertitaqarfiusartunilu ataatsimi arlalinniluunniit aningaasaqar-nikkut suliaasanillu ingerlatsinerup misissuiffigeqqissaarneqarsimanerat.

Imm. 2. Aningaasanut inatsit ukiumi aningaasanut inatsiseqarfiusumi akuersissutigineqarpat nalu-naarusiaq imm. 1-imi pineqartoq Naalakkersuisut saqqummiutinngitsoorsinnaavaat.

Aqutsinermi piginnaatitsissut

§ 33. Naalakkersuisut aningaasartuutit nakkutilliisarneq pillugu erseqqinnerusumik malittari-sassaliorsinnaapput.

Imm. 2. Naalakkersuisut kommunit Namminersorlutillu Oqartussat taarsigassarsianut allatullu akiitsunut pisussaaffinnut naatsorsuutaat pillugit malittarisassanik erseqqinnerusunik aalajangersaasinnaapput, soorlu pisussaaffinngoratarsinnaasunut, attartortitsinissamut isumaqatigiissutit, pisortat namminersortullu suleqatigiinneri il.il. aamma tamakku pillugit aningaasaqarnermut naalakkersuisoqarfimmuut nalunaaruteqartarnerit. Naalakkersuisut tassunga atatillugu naalakkersuisup taassuma Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartup nakkutilliinissamut atugassanik paasissutissanik kommuninut piniarsinnaaneranik aalajangersaasinnaapput.

Kapitali 6

Naatsorsuutit

Missingersuusiornermut Naatsorsuusiornermullu Siunnersuisoqatigiit

§ 34. Namminersorlutik Oqartussat naatsorsuuserinermut pisortaat aallartitaq Naalakkersuisunit toqqarneqartoq aamma aallartitat kommuninit toqqarneqartut peqatigalugit Missingersuusiornermut Naatsorsuuserinermullu Siunnersuisoqatigiinni ilaasortaavoq. Siunnersuisoqatigiit missingersuutinut naatsorsuutinullu tunngasuni pisortat ataatsimut soqutigisaannut tunngatillugu apeqqutini Naalakkersuisunut siunnersuisassapput.

Imm. 2. Sinniisuutitaq Naalakkersuisunit toqqagaasoq siunnersuisoqatigiinni siulittaasuussaaq, soorlu Naalakkersuisut siunnersuisoqatigiinnut allattaanermik isumaginnittuussasut.

Imm. 3. Naalakkersuisut Missingersuusiornermut Naatsorsuusiornermullu Siunnersuisoqatigiinnut tunngatillugu erseqqinnerusumik malittarisassaliorsinnaapput, tassunga ilanngullugu siunnersuiso-qatigiit suleriaasissaat aalajangersaaffigisinnaavaat.

Namminersorlutik Oqartussat naatsorsuutaat

§ 35. Naalackersuisut ukiumut aningaasanut inatsiseqarfiusumut kingullermut tunngatillugu Nunatta Karsiata naatsorsuutai kukkunersuisut allattugaat ilanngullugit kingusinnerpaamik Inatsisartut ukiakkut ataatsimiinneranni saqqummiuttassavaat.

Imm. 2. Nunatta Karsiat naatsorsuutaasa sananeqarnermikkut ukioq aningaasanut inatsiseqarfiusoq aamma ilassutitut aningaasanut inatsiseqarfiusoq malissavaat, imarissavaalu ukiumi aningaasanut inatsiseqarfiusumi kingullermi Nunatta Karsiata isertitai aningaasartuutaalu tamarmiusut kiisalu Nunatta Karsiata pigisai nalillit akiligassaalu aamma ukiup ingerlanerani atuisimanerit.

§ 36. Naalackersuisut Namminersorlutik Oqartussat naatsorsuuseriveqarnerat pillugu malitarsissaliorinnaapput. Naalackersuisut malitarsissaliornerminni naatsorsuuseriveqarnerup iluani isumannaatsuunissap torersumillu ingerlatsinissap eqqarsaatigineqarnerisa saniatigut paasissutissanik aningaasaqarnermik pilersaarusiormut, aqutsinermut nakkutilliinermullu atorneqartussanik pissarsisinnaaneq eqqarsaatigissavaat.

§ 37. Namminersorlutik Oqartussani naalackersuisoqarfiit, aqutsisoqarfiit suliffeqarfiillu il. il. § 1-imi pineqartut paasissutissanik Naalackersuisunut nalunaaruteqartassapput aamma naatsorsuinerimi atortut Naalackersuisut Nunatta Karsiata naatsorsuutaanik saqqummiussinissamut pisariaqartitaat pissarsiarisassavaat.

§ 38. Nunatta Karsiata ukiumoortumik naatsorsuutaanik kukkunersuiisarneq kukkunersuiisunit naalagaaffimmit akuerisaasunit Inatsisartut toqqagaannit isumagineqartassaaq.

§ 39. Nunatta Karsiata naatsorsuutai pisortat kukkunersuiinermi ileqqorissaarnissaat naapertorlugu kukkunersuisut kukkunersiortassavaat aamma Nunatta Karsiata naatsorsuinerimi atortui isornartorsuiisumik misissortassavaat. Kukkunersuisut ilaatigut naatsorsuutit eqqortuunersut misissortassavaat, aamma pissutsit naatsorsuutinik saqqummiussinermi pineqartut aningaasaliissutitut, inatsisut najoqqutassanullu allanut kiisalu isumaqatigiissutigisanut aamma suleriaatsinut nalinginnaasunut naapertuunnersut misissortassavaat.

Imm. 2. Kukkunersuiisoq Inatsisartut kukkunersuiinermut tunngatillugu piumasagaataanik malinnissaaq, piumasagaatit inatsimmut aamma pisortat kukkunersuiinermi ileqqorissaarnissaannut akertiunngippata.

§ 40. Naalackersuisut paasissutissanik sugaluartunik naatsorsuutit naliliiffiginissaannut pisariaqartinneqartunik kukkunersuiisunut nalunaaruteqassapput, takuuk Inatsisartut Naalackersuisullu pillugit Inatsisartut inatsisaanni § 18 aamma § 19.

Kommunit naatsorsuutinik nalunaarsuisarnerat naatsorsuutaallu

§ 41. Kommuniip naatsorsuutaani nalunaarsorneqassapput kommuniip aningaasaatai qanoq aquneqarsimanersut aammalu aqunneqarnerat ukiumoortumik aningaasanut missingersuusianut kommunalbestyrelsillu aalajangiinerinut allanut naapertuuttuunersut.

Imm. 2. Kommuniip aningaasaatai isumannaatsumik paarineqassapput. Aningaasat ullormut ator-neqartussatut tigoriaannaatinneqanngitsut aningaaserivimmuk ikineqassapput imaluunniit obligati-oninut aningaasaliinermiluunniit uppersaatinut inissinneqassallutik aningaasaateqarfiit aningaa-saataannik inissiiffigineqarsinnaasunut.

§ 42. Kommuniip naatsorsuutai aningaasaqarnermut ataatsimiititaliamit kommunalbestyrelsimut saqqummiunneqassapput. Naatsorsuutinut ilaatinneqassapput:

- 1) kommuniip qularnaveeqqusiinerinut, attartornerinut, attartortitsinerinut aamma qularnaveeqqu-siissuteqarnermi pisussaaffinut nalunaarsuutit,
- 2) pisariaqartitsineq naapertorlugu pissutsit qanoq ittuunerannut nassuiaatit, minnerunngitsumik aningaasaliissutaasut naatsorsuutaasullu malunnaatilimmik nikingassuteqarneranni, aamma
- 3) kommuniip aningaasaliiffigisassatut pilersaarutaanut, ukiunut arlalinnut missingersuusiaanuk il. il. tunngatillugit pissutaasunut nassuiaatit

Imm. 2. Kommunilbestyrelsiip naatsorsuutinut nassuiaatit isummerfigissavai aamma naatsorsuuti-ni immikkuualuttut malitseqartinneqassanersut isummerfigissallugit, tamatumalu kingorna naatsor-suutit kommunilbestyrelsiip kukkunersuiisunut Naalakkersuisunullu ingerlatissavai.

Imm. 3. Naalakkersuisut naatsorsuutit saqqummiunneqarnissaat pillugu malittarisassaliussapput.

§ 43. Kukkunersuiisup oqaaseqaatai Aningaasaqarnermut Ataatsimiititaliamut nalunaarutigineqas-sapput. Aningaasaqarnermut Ataatsimiititaliaq ingerlatsivinnit aningaasaqarnermut ataatsimiititaliap toqqaannartumik ataaniinngitsunit akissuteqaatinik piunasaqassaaq. Akissuteqaatit Aningaasaqar-nermut Ataatsimiititaliap kommunilbestyrelsimut inassuteqaataani ataatsimoortuni ilaatinneqassap-put. Kommunilbestyrelsiip alajangiiffigissavaa ukiumoortumik naatsorsuutinut oqaaseqaataasut akissuteqarfigineqarnissaat aammalu ukiumoortumik naatsorsuutit akuersissutigineqarnissaat.

Imm. 2. Kommunilbestyrelsi aalajangeereerpat, tak. imm.1, aalajangiussaq kukkunersuiisut oqaa-seqaataat ilanngullugit Naalakkersuisunut nassiuunneqassapput.

Imm. 3. Ukiumoortumik naatsorsuutit inaarutaasumik akuerineqarnerannit kingusinnerpaamik ul-lut 14-it qaangiunneranni kukkunersuiisut allattugaat ilanngullugit kommuniip nittartagaani tamanit takuneqarsinnaangussapput.

§ 44. Kommunit tamarmik akuerisaasunik kukkunersuiisooqassapput kukkunersuiisunut inatsit sukkulluunniit atuuttoq tunngavigalugu. Kukkunersuiineq Naalakkersuisunit akuerineqassaaq. Kommunilbestyrelsiip kukkunersuiisooq akuerisaasooq asoortissappagu Naalakkersuisut akuersiteq-qaartinneqassapput.

Imm. 2. Kommuniip naatsorsuutai pisortat kukkunersuiinermi ileqqorissaarnissaat naapertorlugu kukkunersuiisut kukkunersuiortassavaat aamma kommuniip naatsorsuunermi atortui isornartorsiuisu-mik misissortassavaat.

Imm. 3. Kukkuersiuisut sukkulluunniit nalunaaruteqaqqaaratik karsimik misissuisinnaatitaapput akuttunngitsunillu kommunip naatsorsuutaanik misissuisassallutik, tassungalu atatillugu nakkutillii-nermi iliuusissatut akuerisaasut, taakkununga ilanngullugit qarasaasiat atornissaannut najoqqutas-siat toqqissisimanartuunersut misissorneqarnissaat siuunertaralugu.

Imm. 4. Kommunalbestyrelsi paasissutissanik pissarsinissamut paasissutissanillu kukkuersiuisut ingerlatsinerminni pisariaqartitaannik tunniussinissamut pisussaavoq.

Imm. 5. Imm. 3 naapertorlugu kukkuersiuisut suliaqarnerannut atatillugu § 43, imm. 1 aamma 2 kukkuersiuisut nalunaarutaannut atorneqarsinnaapput.

§ 45. Kommunalbestyrelse kommunip karsiata naatsorsuuseriviatalu aaqqissuussaanerannut sule-riaaseqarnerannullu tunngatillugit malittarisassaliusaaq. Malittarisassaq kommunip kukkuersiui-suinut nassiunneqassaaq, taakkualu allannguutinik atulersitsinnginnermi tamatigut ilisimatinneqar-tassapput.

Imm. 2. Kommunip karsiata naatsorsuuseriveqarneratalu aqunneqarnissaannut, kontulersuisarnis-samut, kukkuersiuisarnissamut aamma kukkuersiuisut oqaaseqaateqartarnissaannut Naalackersui-sut malittarisassaliorsinnaapput.

Kapitali 7

Aningaasaqarnermut Siunnersuisoqatigiit

§ 46. Naalackersuisut Aningaasaqarnermut Siunnersuisoqatigiit akit nikerarnerannik aningaasa-qarnermillu ingerlatsinerup attanneqarsinnaanerannik nalilersuisussat pilersissavaat. Aamma Naalak-kersuisut siunnersuisoqatigiit qinnuigisinnaavaat inuiaqatigiit aningaasaqarnerannut pingaarutilin-nik allatigut siunnersoqqullutik.

Imm. 2. Aningaasaqarnermut Siunnersuisoqatigiit katitigaanerat, piffissaq atuuffissaat il.il. nalu-naarutikkut aalajangersarneqassapput.

Imm. 3. Aningaasaqarnermut Siunnersuisoqatigiit allattoqarnerat aningaasaqarnermut naalackersuisoqarfimmit isumagineqarpoq.

Imm. 4. Naalackersuisut Aningaasaqarnermut Siunnersuisoqatigiit suleriaasissaat aalajangersar-sinnaavaat.

Kapitali 8

Pineqaatissiissutaasinnaasut

§ 47. Inatsit manna malillugu pisussaaffigisanik kommunalbestyrelsi isumaginnikkusunngippat Nakkutilliisoqarfik kommunalbestyrelsimi ilaasortanut pisussaaffimmik isumaginnikkusunngitsunut pinngitsaaliissummik akileeqqusilluni peqqusisinnaavoq.

Imm. 2. Kommunalbestyrelsimut ilaasortaq kommunalbestyrelsimi ilaasortatut pisussaaffimminik sakkortuumik unioqqutitsisoq akiliisinneqartussanngortinneqarsinnaavoq.

Imm. 3. Assuarliut imm. 2 naapertorlugu pisoq taamaallaat Nakkutilliisoqarfiup piumasqaqarneratigut pisinnaavoq.

Kapitali 9

Atuutilersinneqarnera ikaarsaariarnermilu aalajangersakkat

§ 48. Inatsisartut inatsisaat 1. januar 2018 atuutilissaaq, taamaattoq takuuk imm. 2-4.

Imm. 2. §§ 14 aamma 17-ip atuutilerfissaannut piffissaq nalunaarut aqqutigalugu Naalakkersuisunit aalajangersarneqassaaq.

Imm. 3. § 18 1. december 2016 atuutilissaaq.

Imm. 4. § 26, imm. 3-5, aamma §§ 27-30 ulloq 1. januar 2019 atuutilissapput.

Imm. 5. Ulloq 31. december 2017 Namminersornerullutik Oqartussat naatsorsuuseriveqarnerat il. il. pillugit Inatsisartut inatsisaat nr. 23, 3. november 1994-imeersoq, Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersoq §§ 21-24 kisiisa pinnagit, Namminersornerullutik Oqartussat missingersuutaat pillugit Inatsisartut inatsisaata nr. 8, 29. oktober 1999-imeersup allanngortinneqarneranik Inatsisartut inatsisaat nr. 1, 23. maj 2000-imeersoq kiisalu Kommunit aqunneqarnerat pillugu Inatsisartut inatsisaat nr. 22, 18. november 2010-meersumi §§ 40-50 atorunnaarsinneqassapput.

Imm. 6. Inatsisitigut aalajangersakkat imm. 5-mi inatsisit aalajangersakkallu taaneqartut malillugit atortussanngortinneqarsimasut atuutiinnassapput inatsisitigut aalajangersakkanik Inatsisartut inatsisaat manna malillugu atortussanngortinneqartunik taarserneqarnissaat tikillugu.

§ 49. Sanaartugassanut Iluarsagassanullu Aningaasaateqarfik, takuuk Namminersornerullutik Oqartussat missingersuutaat pillugit Inatsisartut inatsisaanni §§ 21-24, §§ 14-17 atulersinneqarnerisa ukiut tallimat qaangiunneranni ulloq 31. december atorunnaarsinneqassaaq, takuuk § 48, imm. 2. Namminersornerullutik Oqartussat missingersuutaat pillugit Inatsisartut inatsisaanni §§ 21-24 Sanaartugassanut Iluarsagassanullu Aningaasaateqarfiup atorunnaarsinneqarnerata peqatigisaanik atorunnaarsinneqassapput.

Imm. 2. Naalakkersuisut Sanaartornermik Iluarsartuussisarnermillu aningaasaateqarfiup atorunnaarsinnissaanut malittarisassanik erseqqinnerusunik aalajangersaasinnaapput, tassunga ilanngullugu aningaasaateqarfiup ataani sulianik atorunnaarsitsinernut atatillugu ikaarsaarnermi aqqissuussinernik aningaasaateqarfiullu aningaasaataanik nuussinernik aalajangersaanerit.

Namminersorlutik Oqartussat, ulloq 28. november 2016



Kim Kielsen